



KETIKA waktu malam, kebanyakan burung berada di habitat masing-masing dan pengunjung berpeluang melihat dengan lebih dekat pelbagai spesies burung liar yang terdapat di Zoo Negara.

# Zoo Negara

*perkenal pakej berjalan malam*

Oleh HAMDAN TAWADI  
([pelancongan@utusan.com.my](mailto:pelancongan@utusan.com.my))  
Gambar ABD. RAHMAN SALEH

**M**UNGKIN ada yang berpendapat zoo adalah tempat yang membosankan. Antara sebab yang dikatakan menyumbang kepada perkara itu ialah haiwan di dalam zoo dilihat kurang aktif, malah ada yang sekadar mendiamkan diri.

Tambahan pula cuaca yang agak panas sekarang, menyebabkan orang ramai semakin kurang berminat ke situ.

Jika itu adalah punca anda menghindari zoo, tentu anda akan berubah fikiran apabila mengikuti 'Pakej Berjalan Malam' Zoo Negara di Hulu Kelang, Selangor.

Menerusi pakej itu, pengunjung akan dibawa berjalan kaki mengelilingi zoo dalam masa kira-kira satu jam, bagi menyaksikan secara dekat haiwan-haiwan yang aktif di dalamnya.

Anda tentu akan terperanjat melihat haiwan-haiwan yang pasif di waktu siang bertukar menjadi amat aktif pada waktu malam.

Pendek kata, zoo benar-benar 'hidup' pada malam hari, maka ini adalah waktu yang paling sesuai untuk mengunjunginya.

Lebih menyeronokkan anda tidak perlu berpanas di bawah matahari malah dapat menikmati kenyamanan malam.

Antara yang menarik, pengunjung dapat melihat harimau diberi makan seolah-olah mereka sedang memburu dan sang tapir yang agak pemalu pada waktu siang tetapi jauh lebih mudah didekati pada waktu malam.

Pada masa itu juga ular keluar memburu dan badak air keluar mencari makanan.

Tidak ketinggalan burung-burung pada waktu siang banyak menghabiskan masa di udara akan berada lebih dekat dengan pengunjung, sehinggalah burung botak upeh tanpa disedari berada di sebelah anda.

Semua ini sukar malah ada yang tidak dapat ditemui jika kunjungan dibuat pada siang hari.

Pengunjung juga akan disajikan dengan pertunjukan daripada memerang bernama AB dan Boboy serta rakun bernama Black.